

四庫全書

子部

欽定四庫全書

子部

御定孝經衍義卷六十五至
七

詳校官中書_臣羅錦森

編修_臣倉聖脈覆勘

總校官檢討_臣何思鈞

校對官修撰_臣陳初哲

謄錄監生_臣劉復善

欽定四庫全書

御定孝經衍義卷六十五

天子之孝

論官材

舉逸附

易履卦九二履道坦坦幽人貞吉

朱熹本義曰剛中在下无應于上故為履道平坦幽

獨守貞之象

臣按履以行為義幽人以處為義人之所履未有
不合道而吉者坦坦即幽人之貞也苟為艱難阻
絕之行欺世盜名是其志在弓旌而非中不自亂
者矣二之所履者道也則可潛可見用舍行藏一
惟其道而已聖明在上如此人必非長往不返而
摻揚隱逸者亦無能舍旃也

蠱卦
上九不事王侯高尚其事

程頤傳曰上九居蠱之終无應于下處事之外无所

事之地也以剛明之才无應援而處無事之地是賢人君子不偶于時而高潔自守不累于世務者也故云不事王侯高尚其事古之人有行之者伊尹太公望之流曾子子思之徒是也

臣按五文皆幹蠱之人而上非無幹蠱之才也以無應援而處無位之地胡炳文言君子之出處在事之中盡力以幹焉而不為汙在事之外潔身以退焉而不為僻盖有是象則有是占而又戒其必

如是乃可在當人之身則然而伊尹太公非終于
高尚者然則治盪救壞天下未必無其人而莘野
之幣磻谿之載或弗之及也

詩小雅鶴鳴

篇名

其一章曰鶴鳴于九臯

澤也

聲聞于野魚

潛在淵或在于渚樂彼之園爰有樹檀其下惟蘄他山
之石可以為錯

臣

按鶴鳴一詩箋云教宣王求賢人之未仕者一

鳥不鳴九澤而云九臯者自外數之至于九坎而

猶聞其鳴聲則賢人君子入山惟恐不深入林惟
恐不密而名聞于朝廷之間非必自銜自鬻而乃
知之也在淵在渚以魚之出沒喻賢者進退也以
善樹之檀喻賢者以惡木之樺喻小人上檀下樺
是賢者在上小人在下故人皆樂彼之朝而往觀
之矣寶玉得石錯琢以成器國家得賢匡輔以成
治其理一也王其可以弗求賢人而置于朝乎此
詩繼沔水之後沔水曰規宣王而此曰誨宣王規

為正其已失誨為教所未知然則諸侯之朝宗于天子實賴賢者在朝匡輔之力故教王以博求巖穴知名之士而與之共武服矢文德也

漢世祖建武五年詔徵處士太原周黨會稽嚴光等至京師黨入見伏而不謁自陳願守所志博士范升奏曰伏見太原周黨東海王良山陽王成等蒙受厚恩使者三聘乃肯就車及陛見帝廷黨不以禮屈伏而不謁偃蹇驕悍同時俱逝黨等文不能演義武不能死君釣采

華名庶幾三公之位臣願與坐雲臺之下考試圖國之道不如臣言伏虛妄之罪而敢私竊虛名誇上求高皆大不敬書奏詔曰自古明王聖主必有不賓之士伯夷叔齊不食周粟太原周黨不食朕祿亦各有志焉其賜帛四十疋罷之帝少與嚴光同遊學及即位以物色訪之得于齊國累徵乃至拜諫議大夫不肯受去耕釣于富春山以壽終于家 安帝時南陽樊英少有學行名著海內隱于壺山之陽州郡前後禮請不應公卿舉賢

良方正有道皆不行策書徵之不赴順帝復以策書元
纁備禮徵英英固辭疾篤詔切責郡縣督載上道英不
得已到京稱疾不肯起彊輿入殿猶不能屈帝使出就
太醫養疾月致羊酒其後帝乃為英設壇令公車令導
尚書奉引賜几杖待以師傅之禮延問得失拜五官中
郎將數月英稱疾篤詔以為光祿大夫賜告歸令在所
送穀以歲時致牛酒英辭位不受有詔譬旨勿聽英初
被詔命衆皆以為必不降志南郡王逸素與英善因與

其書多引古譬喻勸使就聘英順逸議而至及後應對
無奇謀深策談者以為失望河南張楷與英俱徵謂英
曰天下有二道出與處也吾前以子之出能輔是君也
濟斯民也而子始以不訾之身怒萬乘之主及其享受
爵祿又不聞匡救之術進退無所據矣

司馬光曰古之君子邦有道則仕邦無道則隱隱非
君子之所欲也人莫已知而道不得行羣邪共處而
害將及身故深藏以避之王者舉逸民揚側陋固為

其有益于國家非以徇世俗之耳目也是故有道德
足以尊主智能足以庇民被褐懷玉深藏不市則王
者當盡禮而致之屈己以訪之克己以從之然後能
利澤施于四表功烈格于上下盖取其道不取其人
務其實不務其名也其或禮備而不至意勤而不起
則姑內自循省而不敢彊致其人曰豈吾德之薄而
不足慕乎政之亂而不可輔乎羣小在朝而不敢進
乎誠心不至而憂其言之不用乎何賢者之不我從

也苟其德已厚矣政已治矣羣小遠矣誠心至矣彼
將叩閤而自售又安有勤求而不至者哉荀子曰耀
蟬者務在明其火振其木而已火不明雖振其木無
益也令人主有能明其德則天下歸之若蟬之歸明
火也或者人主恥不能致乃至誘之以高位脅之以
嚴刑使彼誠君子耶則位非所貪刑非所畏終不可
得而致也可致者皆貪位畏刑之人也烏足貴哉若
乃孝弟著于家庭行誼隆于鄉曲利不苟取仕不苟

進潔已安分優游卒歲雖不足以尊主庇民是亦清
修之吉士也王者當褒優安養俾遂其志以勵廉恥
美風俗斯亦可矣固不當如范升之詆毀又不可如
張楷之責望也至于飾偽以邀譽釣奇以驚俗不食
君祿而爭屠沽之利不受小官而規卿相之位名與
實反心與迹違斯乃華士

太公
華士

少正卯

孔子誅
少正卯

之

流其得免于聖王之誅幸矣尚何聘召之有哉

時又徵廣漢楊厚江夏黃瓊瓊香之子也厚既至豫陳

漢有三百五十年之危以為戒拜議郎瓊將至李固以書逆遺之曰君子謂伯夷隘柳下惠不恭不夷不惠可否之間聖賢居身之所珍也誠欲枕山棲谷擬迹巢由斯則可矣若當輔政濟民今其時也自生民以來善政少而亂俗多必待堯舜之君此為士行其志終無時矣嘗聞語曰嶢嶢者易缺皦皦者易汙盛名之下其實難副近魯陽樊君被徵初至朝廷設壇席猶待神明雖無大異而言行所守亦無所缺而毀謗布流應時折減者

豈非觀聽望深聲名太盛乎是故俗論皆言處士純盜
虛聲願先生宏此遠謨令衆人歎服一雪此言耳

臣按孔子繫易曰君子之道或出或處謂顏淵曰
用之則行舍之則藏蓋所因者時所守者道而初
無所容心于其間也故出則成出行有與行非無
具也處則成處藏有與藏非充隱也若無所挾持
而釣采華名誠有如博士所奏者宜王逸李固之
深有望于樊英黃瓊也要之寡欲知止難進易退

亦足以廉頑立懦苟自度其才于世無所補則終身山棲野伏無所表異于食毛踐土之氓適以成其自知之明而為人君者誠寤寐求賢常若不及則如水之流濕火之就燥自各以類應矣

宋太祖徵處士王昭素至闕昭素酸棗人有學行著易論二十三篇學者多從之至是召見便殿年已七十七矣令講乾卦至九五飛龍在天則斂容對曰此文正當陛下今日之事然唯聖人能合其象引援証據因示諷

諫微旨帝嘉之問以治世養身之術對曰治世莫若愛民養身莫若寡慾帝愛其言書于屏几

臣按昭素之于易學雖不逮周張程朱諸儒有以發揚義文周之微言與義然而宋祖立國之始知崇儒重道而昭素之愛民寡慾二語亦庶幾不負所讀之書有宋一代之經術理學與夫講筵之御不輟于兵戈擾攘之餘皆開基之主有以啟之也程頤論養賢劄子臣竊以議當代者皆知得賢則天下

治而未知所以致賢之道也三代養賢必本于學而德
化行焉治道出焉本朝踵循唐舊而館閣清選止為文
字之職名實未正欲招賢養材以輔時贊化將何從而
致之也臣歷觀古先哲王所以虛己求治何嘗不盡天
下之才以成己之德也故曰大舜有大焉善與人同樂
取于人以為善今天下之大豈乏賢而朝廷無養賢之
地以容徐察其器識高下而進退之也臣今欲乞朝廷
設延英院以待四方之賢凡公論推薦及巖穴之賢必

招致優禮視品給俸而不可遽進以官止以應詔命名
凡有政治則委之詳定凡有典禮則使之討論經畫得
以奏陳而治亂得以講究也俾羣居切磨日盡其材行
其志使政府及近侍之臣互與相接陛下時賜召對詢
以治道可觀其材識器能也察以累歲人品益分然後
使賢者就位能者任職或委付郡縣或師表士儒其德
業尤異漸進以帥臣職司之任為輔弼為公卿施之無
不稱也若是則引彙並進野無遺賢陛下尊賢待士

之心可謂無負于天下矣

臣按明初名臣如宋濂劉基由辟召為佐命而方孝儒由薦舉任文學博士靖難抗節楊士奇由薦舉至華蓋殿大學士其他宦蹟顯著姓氏在人耳目者比比也至如陳靜誠遇在洪武初應聘與參帷幄大計再授翰林院學士辭授禮部侍郎尚書左丞又辭竟以處士卒吳康齋與弼以布衣召至授左諭德具疏固辭命行人送歸其為優禮處士

與士之能以禮自處有足稱者宣德七年詔令各處有文學才行出衆之士自二十五歲以上令有司保舉赴京選用八年詔各布政司按察司府州縣官連名保舉賢良方正一人起送吏部量才擢用猗蘭操招隱詩蓋是時作也猗蘭操曰蘭生幽谷兮曄曄其芳賢人在野兮其道則光嗟蘭之茂兮與衆草為伍於乎賢人兮女其予輔招隱詩曰天之生賢道蘊厥身幼學壯行致君澤民伊傳孔孟

皆古君子孜孜行道未嘗忘世秦漢之衰以退為
賢絕類離倫豈非違天嗟哉若人于身奚補區區
百年草木同腐予嗣祖宗統臨萬邦求賢圖治宵
旰皇皇羣才偕來布列在位道行身尊百世之貴
緬彼山林豈無遐遺往而不來悠悠我思漱石枕
流遠引高蹈雖逸其身而恃于道卷阿之詩梧桐
鳳凰爾其翻然予將爾揚是時宣宗既下詔令復
出御製賜諸大臣以示意其勤于求賢若此自成

化以後薦舉始廢專重科舉然則久廢之典固有
待于大有為之君而後舉行也歟

以上舉逸

御定孝經衍義卷六十五

欽定四庫全書

御定孝經衍義卷六十六

天子之孝

優大臣

臣按經言敬親者不敢慢于人人者衆詞也西銘曰大君者乃天之宗子其大臣宗子之家相蓋公孤卿貳老臣夙德簡畀自天培植自祖宗嗣天子尊為師傅示不敢專敬之所尤屬者也述優大臣

書酒誥

周書篇名武王誥康叔之辭

予惟曰汝劼

固也慎也

殷獻臣侯

甸男衛矧太史友內史友

二史掌邦法在王朝則貳冢宰在侯國則居賓友之地

越獻臣百宗工

即上侯甸男衛太史內史

矧惟爾事服休

坐而論道之臣服

采

起而作事之臣

矧惟若疇

汝之疇

圻父薄違

司馬追逐違命

農父若保

司徒順安萬民

宏父定辟

司空制經界以定法

臣

按此本戒康叔劼罔于酒先當劼罔所賓所友

所事之人其訓辭出于王而曰賓曰友曰事而尊

之為獻為宗為父則王之與叔有同敬協恭之義

而于一話一言之際不敢少有狎侮君子之心也
劄訓為固然則必其知之深而仕之篤不中衰不
旁奪而後為盡劄之義也

周官立太師太傅太保茲惟三公論道經邦燮理陰陽
官不必備惟其人

孔安國傳曰師天子所師傅傳相天子保保安天子
于德義者此惟三公之任佐王論道以經緯國事和
理陰陽不必備員惟其人有德乃處之

少師少傅少保曰三孤

孔安國傳曰此三官名曰三孤孤特也言卑于公尊于卿特置此三者

貳公弘化寅亮天地弼予一人

孔安國傳曰副貳公弘大造化敬信天地之教以輔我一人之治

臣按公者無私之義孤者無朋之義太者尊無以加之辭少者位次于尊之辭要之三公三孤皆以

師道輔佐天子其或以師保而下兼或以六卿而
上攝乃所謂惟其人也然則六卿雖有分職起而
作事未嘗不居坐而論道之列也經曰敬親者不
敢慢于人不敢遺小國之臣而况公卿大臣乎

禮記緇衣子曰大臣不親百姓不寧則忠敬不足而富
貴已過也大臣不治而邇臣比矣故大臣不可不敬也
是民之表也邇臣不可不慎也是民之道也君毋以小
謀大毋以遠言近毋以內圖外則大臣不怨邇臣不疾

而遠臣不蔽矣葉公之顧命曰毋以小謀敗大作毋以嬖御人疾莊后毋以嬖御士疾莊士大夫卿士

呂大臨曰此章言大臣不信而小臣之比國之大患也傳曰不使大臣怨乎不以以大臣之任國之休戚係焉用之斯信之矣不信之斯黜之矣未有居其位而不信之者也大臣不親民疑于所任百姓所以不寧蓋由臣之忠不足于君則君之敬不足于臣徒富貴之而無信任之意也

臣按此章之義大約與朱熹中庸章句所謂敬大
臣則信任專而小臣不得以間之故臨事不眩之
意相為表裏亦中庸之義疏也夫敬之一字乃帝
王之心法從敬親之敬而推書言盛德不狎侮狎
侮君子罔以盡人心狎侮小人罔以盡其力于君
子小人固無所不敬也乃于無不敬之中而又有
所當敬者則不但禮貌之隆而已臣故以為此即
中庸之義疏也

春秋公子益師卒

隱公元年

胡瑗曰君之卿佐是謂股肱故問其疾弔其喪贈其葬必厚其送終之恩此春秋書大夫卒之旨也

仲遂卒于垂壬午猶繹萬入去籥

宣公八年

胡安國傳曰禮大夫卒當祭則不告終事而聞則不繹不告者盡肅敬之誠于宗廟不繹者全始終之恩于臣子今仲遂國卿也卒而猶繹則失寵遇大臣之禮矣春秋雖隆君抑臣而體貌有加焉則廉陛益尊

而臣節礪矣聖人書法如此存君臣之義也

胡寧曰仁宗以富弼母喪在殯罷春宴韓魏公薨神宗發哀過舉數皆得春秋之法

二月癸酉有事于武宮籥入叔弓卒去樂卒事

昭公十五年

胡安國傳曰有事于宗廟大臣泣事而卒于其所則如之何禮雖未之有可以義起也緣先祖之心見大臣之卒必聞樂不樂緣孝子之心視已設之饌而不忍輕徹故去樂而卒事其可也

臣按親親賢賢老老貴貴先王之訓也大臣則兼之者為多矣故于其當職而在事也隆之以公孤

之名設之以殷輔之屬

殷衆士也輔庶人在官者陳其殷置其輔太宰之職

既而不敢煩以政也則尊之為老更賜之以几杖不幸而至于疾則君親問之喪則君親弔之誅德易名贈葬恤孤其送終之禮又如其厚也隱元年書公子益師卒胡安國以為此春秋貴大臣之義其于二去籥于禮有得失而美刺不同比而觀

之則春秋之義雖尊君抑臣而上下之交堅固謹
慎于凡百宗工無有不然其于大臣則接之以恭
遇之以禮至于死生之際尤不敢忽焉

中庸第二十章敬大臣則不眩

朱熹中庸或問曰子謂信任大臣而無以間之故臨
事而不眩使大臣而賢也則可其或不幸而有趙高
朱异虞世基李林甫之徒焉則鄒陽所謂偏聽生奸
獨任成亂范曄所謂妒賢嫉能御下蔽上以成其私

而主不覺悟者亦安得而不慮耶曰不然也彼其所
以至此正坐不知九經之義而然耳使其明于此義
而能以修身為本則固視明聽聰而不可欺以賢否
矣能以尊賢為先則其所置以為大臣者必不雜以
如是之臣矣不幸而或失之則亦亟求其人以易之
而已豈有知其必能為姦以敗國顧猶置之大臣之
位使之姑行文書為職業而又恃小臣之察以防之
哉夫勞于求賢而逸于得人任則不疑而疑則不任

此古之聖君賢相所以誠意交孚兩盡其道而有以共成正大光明之業也如其不然吾恐上之所以猜防畏備者愈密而其為眩愈甚下之所以欺罔蒙蔽者愈巧而其為害愈深不幸而臣之姦遂則其禍固有不可勝言者幸而主之威勝則夫所謂偏聽獨任御下蔽上之姦將不在于大臣而移于左右其為國家之禍尤有不可勝言者矣

臣按九經之序脩身尊賢親親敬大臣蓋誠脩身

矣故其所尊者必賢也誠尊賢矣故居大臣之位者必大賢也豈但恃伺察以防之哉

孟子故將大有為之君必有所不召之臣欲有謀焉則就之其尊德樂道不如是不足與有為也故湯之於伊尹學焉而後臣之故不勞而王桓公之於管仲學焉而後臣之故不勞而霸

臣按三公坐而論道三孤弼予一人皆師道也冢宰總攝六卿相職也道德之與政理非異人任徒

師之而不能任之則為士之尊賢而非王公之尊
賢矣不召之臣如伊尹真其人也管仲非其比特
以桓之尊信之者合于古帝王師臣之意故孟子
連而及之

漢文帝時賈誼疏曰人主之尊譬如堂羣臣如陛衆庶
如地故陛九級上廉遠地則堂高陛亡級廉近地則
堂卑高者難攀卑者易陵理勢然也故古者聖王制為
等列內有公卿大夫士外有公侯伯子男然後有官師

小吏延及庶人等級分明而天子加焉故其尊不可及也里諺曰欲投鼠而忌器此善諭也鼠近于器尚憚不投恐傷其器況于貴臣之近主乎廉恥節禮以治君子故有賜死而亡戮辱是以黥劓之臯不及大夫以其離主上不遠也禮不敢齒君之路馬蹙其芻者有罰見君之几杖則起遭君之乘車則下入正門則趨君之寵臣雖或有過刑戮之臯不加其身者尊君之故也此所以為主上豫遠不敬也所以體貌大臣而厲其節也今自

王侯三公之貴皆天子之所改容而禮之也古天子之所謂伯父伯舅也而令與衆庶同黥劓髡笞僇棄市之法然則堂不亡陞乎被戮辱者不泰迫乎廉恥不行大臣無迺握重權大官而有徒隸亡恥之心乎臣聞之履雖鮮不加于枕冠雖敝不以苴履夫嘗已在貴寵之位天子改容而體貌之矣吏民嘗俯伏以敬畏之矣今而有過帝令廢之可也退之可也賜之死可也滅之可也若夫束縛之係縲之輸之司寇編之徒官司寇小吏

詈罵而榜笞之殆非所以令衆庶見也夫卑賤者習知尊貴者之一旦吾亦適可以加此也非所以習天下也非尊尊貴貴之化也夫天子之所嘗敬衆庶之所嘗寵死而死耳賤人安得如此而頓辱之哉古者大臣有坐不廉而廢者不謂不廉曰簠簋不飭坐汙穢淫亂男女無別者不曰汙穢曰帷薄不修坐罷軟不勝任者不謂罷軟曰下官不職故貴大臣定有其辜矣猶未斥然正以諍之也尚遷就而為之諱也故其在大譴大何之

域者聞謚何則白冠鵲纓盤水加劍造請室而請臯耳上不執縛係引而行也其有中罪者聞命而自弛上不使人頸盭而加也其有大罪者聞命則北面再拜跪而自裁上不使捽抑而刑之也曰子大夫自有過耳吾遇子有禮矣遇之有禮故羣臣自憚嬰以廉恥故人矜節行上設廉恥禮義以遇其臣而臣不以節行報其上者則非人類也故化成俗定則為人臣者主耳忘身國耳忘家公耳忘私利不苟就害不苟去唯義所在上之

化也故父兄之臣誠死宗廟法度之臣誠死社稷輔翼之臣誠死君上守圉扞敵之臣誠死城郭封疆故曰聖人有金城者比物此志也彼且為我死故吾得與之俱生彼且為我亡故吾得與之俱存夫將為吾危故吾得與之皆安顧行而忘利守節而仗義故可以託不御之權可以寄六尺之孤此厲廉恥行禮誼之所致也

臣按古者命夫命婦不躬坐獄訟為治獄之吏皆有威嚴恐褻尊故使其屬若子弟代坐取要辭也

自大夫以上其犯法則在八議輕重不在刑書故
曲禮曰刑不上大夫蓋親故賢能功貴勤賓為八
議據曲禮則大夫以上皆為貴也漢承秦弊既尊
君抑臣之太過而治獄之吏又路溫舒所謂十失之
一尚存者也雖以文帝之賢而不講于敬大臣
之經人告絳侯周勃欲反廷尉逮捕治之勃為獄
吏所侵辱既出嘆曰吾嘗將百萬兵然安知獄吏
之貴乎宜乎賈生之痛切言之也

唐明皇時黃州都督裴佖先下獄上與宰相議其罪張嘉貞請杖之張說曰臣聞刑不上大夫為其近于君且所以養廉恥也故士可殺不可辱臣竊巡北邊聞杖姜皎于朝堂皎官登三品亦有微功有罪應死則死應流則流奈何輕加笞辱以皂隸待之姜皎事往不可復追佖先據狀當流豈可復蹈前失上深然之

臣按都督貴臣也古法于八者之辟各據一邊則得八議上與宰相議其罪議訖乃麗邦法而附刑

罰斯得之矣其後明太祖常與侍臣論待大臣之

禮劉基曰古者公卿有罪盤水加劍

凡殺牲以盤水取頸血故

示若此

詣請室

請罪之室

自裁未嘗鄙辱之庶同侍坐因

取大戴禮及賈誼疏以進且曰刑不上大夫所以
礪廉恥而君臣之恩義兩盡也明祖蓋深然之而
未能著令有所禁絕也

舊制宰相上殿命坐而議大政宋太祖時范質等自以
周朝舊臣稍存形迹且憚帝英睿乃請用劄子面取旨

退各疏其事同列書字以誌從之坐論之禮遂廢

臣按宰相坐論之禮雖廢于宋祖之時然自三代而後遇士大夫以禮卒未有如趙宋之君者故其國祚弱而不易亡得尊賢敬士之報也

臣又按有明一代相業莫盛于三楊

楊士奇楊

仁

宣二宗所以待之者甚隆雖未如古者之坐而論道然虛己以聽始終恩遇不替賜敕賜圖書賜印獎勞頻數非復洪永之猜嫌峻急矣時大學士黃淮

辭歸宣宗餞之太液池親製詩送之附錄于此以
見君臣一時明良之盛云詩曰天香早折仙桂枝
筆花五彩開鳳池蓬萊之山直奎壁近侍九重天
咫尺永樂聖人臨御初鞠躬稽首陳嘉謨仁皇監
國文華殿左右謀猷共羣彥朕承大寶君萬方相
與共理資賢良傾心寫情任舊老而卿引疾先還
鄉五厯星霜復相見霜髯蕭蕭秋滿面是時朝旭
光升紫殿明相對清言良慰情留之屢月未盡意

歸心又欲東南征太液清冷涵碧藻楊柳芙蓉相
映好鳬鷺鸕鶿弄晴波紫霧紅雲拂瓊島芳艸在
俎酒在壺工歌鹿鳴續白駒君臣大義士所重心雖
廷闕身江湖雁蕩峯高青不極中有謝公舊游跡
采芝劔苓可長年應在天南憶天北淮歸刻諸石
作奎文亭覆之

以上優大臣

御定孝經衍義卷六十六

欽定四庫全書

御定孝經衍義卷六十七

天子之孝

設諫官

臣按經曰昔者天子有爭臣七人又曰子不可以
不爭于父臣不可以不爭于君當不義則爭之邢
昺疏曰論語曰信而後諫左傳曰伏死而爭蓋極
諫為爭也夫為臣子則以不從令為孝為君父則

以納諫為孝矣皇侃曰夫子作孝經之時當亂衰之代無此諫爭之事故言昔者然則興王懸賞逸王致罰斯為敬慢之殊矣述設諫官

易坎卦六四樽酒簋二用缶納約自牖終无咎

程頤傳曰自古能諫其君者未有不因其所明者也故許直強勁者率多取忤而溫厚明辯者其說多行且如漢祖愛戚嬪將易太子是其所蔽也羣臣爭之者衆矣嫡庶之義長幼之序非不明也如其蔽而不

察何四皓

東園公角里先生
綺里季夏黃公

者高祖素知其賢而重

之此其不蔽之明心也故因其所明而及其事則悟
之如反手且四老人之力孰與張良羣公卿及天下
之士其言之切孰與周昌叔孫通然而不從彼而從
此者由攻其蔽與就其明之異耳又如趙王太后愛
其少子長安君不肯使質于齊此其蔽于私愛也
大臣諫之雖強既曰蔽矣其能聽乎愛其子而欲
使之長享富貴其心之所明也故左司觸龍因其明

而導之以長久之計故其聽也如響

朱熹曰六四居近尊位而在險之時剛柔相濟故有但用薄禮益以誠心進結自牖之象問牖非所由之正乃室中受明之處豈險難之時不容由正以進耶曰非是不可由正蓋事變不一勢有不容不自牖者不自戶而自牖以言艱險之時不可直致也

臣按樽盛酒簋盛食又以瓦缶為樽之副喻禮之至薄也言窮約之時不尚多儀而尚誠實戶人之

所由牖室之所以受明非所由也納約不自戶而
自牖言艱難之際自間道以通于君盖方其困心
衡慮雖逆耳之言猶易入而况將順其美匡救其
惡其辭溫厚明辯不令人悅繹乎如唐德宗之在
奉天陸贄反覆開導往往聽納贄之于德宗斯
可以當納約自牖之占矣

睽卦九二遇主于巷无咎

張栻曰遇主于巷巷者委曲之途也或謂諫于君者

當盡其委曲之義非也伊川

程頤

云至誠以感動之盡

力以扶持之明理義以致其知杜蔽惑以誠其意如是宛轉將就之期于明信而後已此其所以謂之委曲也故孟子謂引其君以當道

臣按二五君臣之位當事勢睽乖之時九二獨遇

六五之主象所謂得中而應乎剛者也其君臣相須之殷不拘堂陛之常分正與坎之納約自牖者相類然而遇非枉道求合巷非邪僻由徑故又必如

程頤之說而後可以言勿欺而後可以言信而後
諫也

書舜典詢于四岳闢四門明四目達四聰

孔穎達疏曰告廟既訖乃謀政治于四岳之官所謀
開四方之門大為仕路致衆賢也明四方之目使為
己遠視四方也達四方之聰使為己遠聽聞四方也
恐遠方有所壅塞令為己悉聞見之

臣按穎達又云目視若其不明耳聰貴其及遠明

謂所見博達謂聽至遠二者互以相見故傳總申其意云廣視聽于四方使天下無壅塞天子之聞見在下必由近臣四岳親近之官故與謀此事也然則天子之近臣明目達聰由之壅塞聞見亦由之矣故舜既以詢四岳矣而于命官之終則又命龍為納言使之聽下言納于上受上言宣于下欲其遏絕讒說而敷奏忠言夙夜出納者如朝奏聞而夕報可也此所以無聽竝觀而杜近臣壅塞之

患雖唐虞極治而防奸之道豈疏于後世哉

循征

夏書篇名仲康命循征義和誓衆之辭

每歲孟春適人以木鐸徇于

路官師相規工執藝事以諫其或不恭邦有常刑

孔穎達疏曰君當謹慎以畏天臣當守職以輔君先王恐其不然故大開諫諍之路每歲孟春適人之官以木鐸徇于道路以號令臣下使在官之衆更相規闕百工雖賤令執其藝能之事以諫上之失常其有違諫不恭謹者國家則有常刑

臣按蔡沈傳曰相規云者胥教誨也孔氏謂相規
相平等之辭平等有闕已尚相規見上之過諫之
必矣百工被遣作器見其淫巧不正當執之諫蔡
氏元度曰周景王將鑄無射伶州鳩諫曰匱財罷
民魯莊丹楹刻桷匠慶諫曰無益于君而替前人
之令德執藝以諫此類是也孔氏謂百工之職猶
令進諫則百工以上不得不諫矣循征以不能規
諫為不恭孟子責難于君謂之恭意本于書也

古者諫無專官而周官保氏掌諫王惡蓋官師百
工乃人適政間因事納忠而師保詔嫩諫惡相與
格其非心也至于經言天子有爭臣七人非謂設
官止有此數大都謂舉朝皆嘿嘿得七人焉以夾
輔之不致于臣皆從令以陷于不義也

伊訓從諫弗咈先民時也是若順也

臣按此承上先王肇修人紀之文蓋君臣父子兄
弟夫婦長幼朋友乃為人之綱紀成湯反之之聖

不敢自謂吾身無有一毫之不盡而有過則改從
諫如流必先民之言是順故伊尹舉此以訓太甲
仲虺之誥言用人惟己改過不吝是從諫弗拂之
實也予聞曰能自得師者王謂人莫己若者亡好
問則裕自用則小是又以所聞于古者告之而商
頌之云自古在昔先民有作溫恭朝夕執事有恪
皆先民時若之証也

太甲有言逆于汝心必求諸道有言遜于汝心必求諸

非道

臣按蔡沈傳曰鯁直之言人所難受與順之言人所易從蓋惟懋敬厥德乃能忘其順逆而求其義理之當若太甲未克變之時欲敗度縱敗禮以速戾于厥躬則不患于保衡固聞其言而逆于心矣亦必有左右近習遜志之言以惑其聽者此所以制為不韋之刑也

說命上說復于王曰惟木從繩則正后從諫則聖后克

聖臣不命其承疇敢不祇若王之休命

陳櫟曰主聖臣直導人使諫在德不在言君有聖德則有從諫之實雖不命亦諫能為江湖何憂百川之不歸君無聖德無從諫之實雖命之亦不諫如器既滿水將焉入高宗以納誨輔德為命知命相之大本說以從諫克聖復命尤知致君之大本也

臣按高宗命傳說作相其命辭首言朝夕納誨以輔台德而終之以惟暨乃僚罔不同心以匡乃辟

申之以欽予時命其惟有終此節以答欽予時命之語也君之從諫猶木之從繩木非生而皆正君非生而皆聖木之正由繩使之然故不可以不從繩君之聖由諫使之然故不可以不從諫也然必有受諫之實而後有敢諫之臣如後世應詔陳言而有以太切直致罪斥者則雖命之實拒之矣故說又以不命其承復欽予時命使以從諫之道反求諸己也

無逸周公曰嗚呼我聞曰古之人猶胥訓告胥保惠胥

教誨民無或胥誨

誨誨也

誨誨也

誨誨也

誨誨也

誨誨也

誨誨也

誨誨也

誨誨也

誨誨也

誨誨也

誨誨也

誨誨也

誨誨也

蔡沈傳曰嘆息言古人德已盛其臣猶且相與誨告

之相與保惠之相與教誨之保惠者保養而將順之

非特告誨而已也教誨則有規正成就之意又非特

保惠而已也惟其若是是以視聽思慮無所蔽塞好

惡取予明而不悖故當時之民無或敢誨誨為幻也

臣按訓告教誨猶言傳之德義道之教訓保惠猶

言保其身體極其大則師傅保之責而其臣皆相與如此此乃殷高宗所謂罔不同心以匡乃辟也忠言交進則邪說莫行故誑欺眩惑之言不入于君之耳否則譎張不已變為詛祝安危在反掌之間也

詩大雅板

篇名

其一章曰上帝板板

反也

下民卒瘁

病也

出話

不然為猶不遠靡聖管管

無所依繫

不實于亶

誠也

猶之未遠

是用大諫

輔廣曰正者常道也循其常則民安反其常則民病
今天既盡反其常道則民亦安得而不盡病乎話者
言語也猶者謀慮也不然則背理傷道也不遠則但
為目前之計也人心知有聖人則動作皆有所依據
故出話不敢不然為猷不至不遠今也出話則不然
為猶則不遠則靡聖管管可知矣既已靡聖管管則
所為皆是虛妄故曰不實于亶不然不遠皆虛妄者
之所為也

四章曰天之方虐無然謔謔老夫灌灌猶款款也小子蹻蹻

其畧反

匪我言耄

非我老耄而妄言

爾用憂謔

乃汝以多將熇

熇

許各反熇熇也

不可救藥

臣

按小序此凡伯刺厲王之詩不敢斥言王而稱

上帝稱天既又呼僚友而切責之又言其與己異

其職事蓋必王之用事之人也經曰天子有諍臣

七人雖無道不失其天下厲王之臣獨有名穆公

凡伯二人而已夫可憂之事當操心慮患夙夜祇

懼以臨之不可用為戲謔苟以可憂之事為戲謔
是樂憂也可憂而樂多行不義將如火之燎原不
能救止此老成人之所以心知其可畏而歎歎然
相告也

左傳齊侯至自田晏子侍于遯臺

臺名

子猶據

梁丘

馳而造

馬公曰唯據與我和夫晏子對曰據亦同也焉得為和
公曰和與同異乎對曰異和如羹焉水火醯醢鹽梅以
烹魚肉燂

章善反
次也

之以薪宰夫和之齊之以味濟

益其

不及以洩

也減

其過君子食之以平其心君臣亦然君所

謂可而有否焉臣獻其否以成其可君所謂否而有可

焉臣獻其可以去其否是以政平而干民無爭心故詩

商頌曰亦有和羹

羹備五味

既戒既平

醴子容反

嘏

古雅反

無言時

靡有爭

醴總也

政能使上下皆如和羹

大

先王之濟五味和五聲

也以平其心成其政也聲亦如味一氣

須氣以動

二體

舞有文武

三類

風雅頌

四物

雜用四方之

物以成器

五聲六律七音八風九歌

九功之德皆可歌

以相成也清濁大小短長疾徐哀樂剛柔遲

卷六十七
速高下出入周

密也

疏以相濟也君子聽之以平其心

平德和故詩曰

幽風

德音不瑕

闕也

今據不然君所謂可據

亦曰可君所謂否據亦曰否若以水濟水誰能食之若
琴瑟之專一誰能聽之同之不可也如是

昭公二十年

臣

按齊景公嘗悅晏子之言而興發補不足命太

史作君臣相悅之樂矣晏子惟能獻君之否以成

君可獻君之可以去君否故其詩曰畜君何尤孟

子曰畜君者好君也當斯之時則晏子之于景公

可謂和矣若君可亦可君否亦否之梁丘據則必

不能回流連荒亡之志而為先王之觀也是歲齊侯

牾

癘疾

期而不瘳諸侯之賓問疾者皆在梁丘據裔

欸二嬖大夫者欲誅祝史以辭賓言于公公告晏

子晏子言諸苛政民所苦病億兆人詛祝祝有益

詛亦有損非誅祝史所能治公說于晏子之言使

有司寬政毀闕去禁薄斂已責

除逋債

當斯之時則

晏子之于景公又幾可謂和矣遯臺之遊乃曰惟

據與我和然則公第知可亦可否亦否者之為和
而于晏子之言雖從之而未必好也安有所為君臣
相悅者哉夫人君有聽言之美往往不出于誠然
以唐太宗之于魏徵常退朝而盛怒見正宮闈其君臣
之好不終固不待仆碑徵卒太宗自製碑文并為書石既而以徵嘗薦杜正倫侯君集疑其阿黨人有言徵自錄前後諫辭以示起居郎褚遂良者愈不悅路所撰碑之日
也故非一德同心不足以語于和矣

國語周語厲王虐國人謗王召公告王曰民不堪命矣

王怒得衛巫使監謗者以告則殺之國人莫敢言道路

以目王喜告召公曰我能弭謗矣乃不敢言召公曰是

障之也防民之口甚于防川川壅而潰傷人必多民亦

如之故為川者決之使導為民者宣之使言故天子聽

政使公卿至于列士獻詩瞽獻典樂典史獻書外史掌三

書師箴瞽賦賦公卿列士所獻書矇誦誦箴諫之語百工諫執藝事庶人

傳語卑賤不得達近臣矇僕之屬畫規親戚補察瞽史教誨

大師大史掌陰陽天時耆艾修之師傳之屬修理瞽史之教以聞于王而

後王斟酌焉是以事行而不悖民之有口也猶土之有山川也財用于是乎出猶其有原隰衍沃也衣食于是乎生口之宣言也善敗于是乎興行善而備敗所以阜厚財用衣食者也夫民慮之于心而宣之于口成而行之胡可壅也若壅其口其與能幾何王弗聽于是國人莫敢出言三年乃流王于羗晉地

臣按召公名穆公虎也厲王之時賦斂重數徭役煩多人民勞苦輕為奸宄彊凌弱衆暴寡作寇虐

故召穆公作民勞之詩以刺王其板八章小序凡
伯刺厲王也今由衛巫監謗之事觀之召公之諫
亦但言防民之口之不可耳未敢指陳夫不堪命
之實事也民勞為同列相戒之詞板切責僚友召
公凡伯親賢舊臣宜其可以極言而力救顧不敢
直致其諫而姑責同僚以使之聞之宜國人之莫
敢言而卒以基禍也

晉語范文子

士

曰興王賞諫臣逸王罰之我聞古之王

者政德既成又聽于民

詢芻蕘聽謗譽

于是乎使工誦諫于朝

在列者獻詩使勿墮

惑風也宋

聽臚傳

言于市辯妖祥于

謠

行歌曰謠

考百事于朝問謗譽于路有邪而正之盡戒之

術也先王疾是驕也

臣

按興王賞諫臣逸王罰之二語千古興亡理亂

之大要也彘之禍成于監謗盡戒之術必聽于民
豈不然哉凡民風市語童謠之屬以至違怨詛祝
之辭有理存焉皆我諫臣也聞而改之賞莫大焉

也易咸卦象曰君子以虛受人惟虛故能弘納諫
之益故曰先王疾是驕也

楚語靈王虐白公子張驟諫王患之謂史老

楚子曰我

欲已子張之諫若何對曰用之實難已之易也若諫君

則曰余左執鬼中右執殤宮

中身也天死曰殤殤宮殤之居也執謂把其錄籍制

服其身知
其方處

凡百箴諫我盡聞之矣寧聞它言白公又諫

王如史老之言對曰昔殷武丁能聳

敬也其德至于神明

夢見
傳說

以入于河

內河

自河徂亳

於是乎三年默以思道

既得道猶不敢專制使以象旁求聖人既得以為輔又恐其荒失遺忘故使朝夕規誨箴諫曰必交脩余無余棄也今君或者未及武丁而惡規諫者不亦難乎王病之曰子復語我不穀雖不能用吾慙牛刃切切願也寘之于耳對曰賴君之用也故言不然巴浦之犀聲隣稽切咒象其可盡乎其又以規為填所以塞耳也

臣按此見人君不徒以受盡言容直臣為美而用之實難也靈王聞白公之言而病之曰雖不能用

慙寘于耳若是乎與語之而不達拒之而不受者
有間也白公曰不能用之是猶以規為瑱矣故靈
王非有殺諫臣之惡也州來之役右尹子革誦祈
招之詩以諫王王感其言至于饋不食寢不寐者
數日則非徒慙寘于耳矣卒也不能自克以及于
難是故用之實難也仲尼曰古也有志克己復禮
仁也信善哉楚王若能如是豈其辱于乾谿地名

論語子曰法語之言能無從乎改之為貴吳與之言能

無說乎繹之為貴說而不繹從而不改吾末如之何也已矣

臣按夫人必有秉彝之性故非肆于惡而無忌憚者明義而正告之未或不從委曲而開導之未或不悅然其物欲堅強則不能屈就于理志氣昏惰則不能反求諸心故終于不改繹也朱熹曰如漢武帝見汲黯之直深所敬憚至帳中可其奏可謂從矣然武帝內多欲而外施仁義豈非面從如孟

子論好貨好色齊王豈不悅若不知繹則徒知古
人所謂好色不知其能使內無怨女外無曠夫徒
知古人之所謂好貨不知其能使居者有積倉行
者有裹糧也他日夫子又曰忠焉能勿誨乎集註
忠而勿誨婦寺之忠盖用詩大雅瞻仰篇匪教匪
誨時惟婦寺為訓也然而禮有三諫不聽則去之
文而子游言事君數斯辱矣人主知夫人臣納誨
之為忠而又知有不可則止之義則從而改悅而

卷六十七
繹不陷于不義矣

中庸舜好問而好察邇言隱惡而揚善

朱熹曰雖淺近言語莫不有至理寓焉人之所忽而舜好察之非洞見道體無精粗差別不能然也孟子曰自耕稼陶漁以至為帝無非取于人者又曰聞一善言見一善行若決江河沛然莫之能禦此皆好察邇言之實也伊川曰造道深後雖聞常人言語莫非至理又曰言之善者播揚之不善者隱匿之則善者

愈樂告以善而不善者亦無所愧而不惜言也求善之心廣大光明如此人安得不盡言來告而我亦安得不盡聞人之言乎

子曰人皆曰予知驅而納諸罟

網也獲

機檻也

陷阱

坑坎也

之

中而莫之知辟也人皆曰予知擇乎中庸而不能期月守也

臣按大聖人心事只是與予知之人相反而已一有予知之心則自用而不好問矣以邇言為不足

聞矣暴人之惡而蔽人之善矣楚靈王之左執鬼中
右執殤宮所以召乾谿之辱豈非自投于罟獲陷
阱之中乎中庸之道廣大光明舍此皆罟獲陷阱
也不為舜則為予知之人凡飾非拒諫以底覆亡
皆自謂人莫己若始也問察隱揚之義朱熹之說
備矣

孟子禹聞善言則拜

臣按禹拜昌言見于書大禹謨臯陶謨一是舜命

禹征苗已誓師往伐而益贊禹以修德禹聞益言
心領神會屈已拜之一是帝舜朝禹臯陶相與語
于帝前臯陶陳謨以慎厥身修思永發端禹然而
拜之孟子即書辭以推其意謂禹聞善言則拜也
夫以禹之不矜伐滿假而益猶以滿損謙益為言
臯陶則言智仁兩盡雖黨惡如驩兜者不足憂昏
迷如有苗者不足遷與夫好言善色大包藏奸惡
者不足畏蓋益臯陶造道之精微所言之深遠大

禹樂善之心真見為不及而拜之也

漢文帝每朝郎從官上書疏未嘗不止輦受其言言不可用置之言可用采之未嘗不稱善

二年五月詔曰古之治天下朝有進善之旌誹謗之木所以通治道而來諫者也今法有誹謗妖言之罪是使衆臣不敢盡情而上無由聞過失也將何以來遠方之賢良其除之

臣按漢文止輦受言隱惡揚善其謙抑虛受之氣

象後世未有過之者載考高帝三章之法已除去
誹謗偶語法條而二年五月詔云今法有誹謗妖
言之罪或者入關之始但與父老口約而未及刪
去律文故也進善之旌應劭曰旌幡也堯設之五
達之道令民進善也如淳曰欲有進善者立于旌
下言之誹謗之木服虔曰堯作之橋梁午柱頭應
劭曰橋梁邊板所以書政治之愆失也鄭康成註
禮云一縱一橫為午謂以木貫柱四出即今之華

表蓋至秦皆去之孝文乃令復施也計當時必有
立旌書木者史略而不書後世亦有詔公車設謗
木肺石二函與置紙筆于陽武門外以求得失者
匪鮮終則繁文也已

武帝方招文學儒者上曰吾欲云云汲黯對曰陛下內
多欲而外施仁義奈何欲效唐虞之治乎上默然怒變
色而罷朝公卿皆為黯懼上退謂左右曰甚矣汲黯之
戇也羣臣或數黯黯曰天子置公卿輔弼之臣寧令從

諛承意陷主于不義乎且已在其位縱愛身奈辱朝廷何

臣按漢武帝知汲黯而不能用黯亦以數切諫不得久居于中蓋內多欲而外施仁義正不能受盡言之實也多欲則不能自克不能自克則逆心之言必難入遜志之語必易從雖以帝之目黯為社稷臣敬禮之過于大將軍丞相而終見疏遠遂使方士神仙之說桑孔貨利之謀窺其所欲而雜然

投之無所不至矣

光武時大司徒韓歆好直言無隱諱帝每不能容歆于上前證歲將饑凶指天畫地言甚剛切坐免歸田里帝猶不釋復遣使宣詔責之歆及子嬰皆自殺歆素有重名死非其罪衆多不厭帝乃追賜錢穀以成禮葬之

司馬光曰昔高宗命說曰若藥弗瞑眩厥疾不瘳夫切直之言非人臣之利乃國家之福也是以人君日夜求之唯懼弗得聞惜乎以光武之世而韓歆用直

諫死豈不為仁明之累哉

安帝令公卿下至郡國守相各舉有道之士一人尚書
陳忠以詔書既開諫諍慮言事者必多激切或至不能
容乃上疏豫通廣帝意曰臣聞仁君廣山藪之大納切
直之謀忠臣盡謇諤之節不畏逆耳之害是以高祖舍

周昌桀紂之譬孝文喜袁盎人豕

呂后斷戚夫人手足
去眼燂耳飲瘡藥使

居廁中名曰人彘盎引却文帝
所幸慎天人坐舉以為諫也

之譏武帝納東方朔宣

室之正

武帝置酒宣室見
董偃朔諫止之

元帝容薛廣德自刎之切

帝酌

祭欲御樓船廣德諫宜從
橋願自刎以血汙車輪

今明詔崇高宗之德推宋景

之誠引咎克躬詔訪羣吏言事者見杜根成翊世等新
蒙表錄顯列二臺必承風響應爭為切直若嘉謀異策
宜輒納用如其管穴妄有譏刺雖苦口逆耳不得事實
且優游寬容以示聖朝無諱之美若有道之士對問高
者宜垂省覽特遷一等以廣直言之路

臣按世祖仁明東京再造而韓歆不免以直言受
誅甚哉苦言之難當也陳忠之豫通廣上意其指

切矣夫嘉謀異策宜輒納用妄有譏刺不得事實
亦優游寬容乃所以來諫者矣若一有不當而輒
加譴責則雖有嘉謀異策而不便之者往往附致
于不得事實之際而罰及之矣夫興王止有不諫
之刑而曷嘗有失言之罰哉

魏高宗時高允好切諫朝廷事有不便允輒求見帝嘗
屏左右以待之或自朝至暮或連日不出羣臣莫知其所
言語或痛切帝所不忍聞命左右扶出然終善遇之時

有上事為激訐者帝省之謂羣臣曰君父一也父有過
子何不作書衆中諫之而于私室屏處諫者豈非不
欲其父之惡彰于外耶然至事君何獨不然君有得
失不能面陳而上表顯諫欲以彰君之短明己之直此
豈忠臣之所為乎如高允者乃忠臣也朕有過未嘗不
面言至于朕所不堪聞者允皆無所避朕知其過而天
下不知可謂忠乎

臣按游雅常稱高允內文明而外柔順而崔浩謂

其乏矯矯風節然浩之所以得罪者正以不隱惡
沽直名故也論其世則高允之不為矯矯風節良
有以焉夫惟魏主之不欲天下知其過也此允之
所以不敢顯諫也記曰事親有隱而無犯事君有
犯而無隱忠孝之理則同而其事自異也且事有
不便或面陳其可否或疏論其得失各因其緩急
小大其所處之職亦有貴賤親疏有不得而面陳
者亦有不得而疏論者非必以面陳為慎密疏論

為激訐也如魏主之言異乎明目達聰而使下情無壅者矣

梁武帝時散騎常侍賀琛上書論事詔切責之琛啟陳四事其一言戶口凋落牧守貪殘其二言風俗侈靡宜道以節儉三言斗筭之人詭競求進四言省事息費上大怒召主書于前口授敕書以責琛大指以為卿何不分別顯言某刺史橫暴某太守貪殘尚書蘭臺某人姦猾使者漁獵竝何姓名取與者誰明言其事又士民飲

食過差若加嚴禁密房曲室云何可知倘家家摻檢恐益增苛擾卿又曰百司奏事詭競求進今不使外人呈事誰尸其任卿云吹毛求疵復是何人擘肌分理復是何事治署邸肆等何者宜除何者宜減何處興造非急何處徵求可緩各出其事具以奏聞若不具列則是欺罔朝廷佇聞重奏當復省覽琛但謝過而已不敢復言司馬光曰梁高祖之不終也宜哉夫人君聽納之失在于叢脞人臣獻替之病在于煩碎是以明主守要

道以御萬幾之本忠臣陳大體以格君心之非故身
不勞而收遠功言至約而為益大也觀夫賀琛之諫
未至于切直而高祖已赫然震怒護其所短矜其所
長詰貪暴之主名問勞費之條目困以難對之狀責
以必窮之辭自以蔬食之儉為盛德日昃之勤為至
治君道已備無復可加羣臣箴規舉不足聽如此則
自餘切直之言過于琛者誰敢進哉由是姦佞居前
而不見大謀顛錯而不知名辱身危覆邦絕祀為千

古所閔矣豈不哀哉

臣按人臣進言或通于天下之大勢或專指一事之失常或追述其致此之由或逆覩其將來之害或略開其端緒不必深言或喻事于同情在人自悟或為之危言或為之隱語聽言者以理揆之則無不得也以情通之則無弗喻也貪暴者幾何人不必詰主名而按之可知勞費者幾何事不必問條目而有司具存但霽顏令披瀝心腹豈有難對

之狀但溫旨令敷陳終始豈有必窮之辭惟權奸
以此術制敢言之士務令所詰者不得而一一主
名所問者不得而件件條目鉤校意計之表使之
難對毛舉細微之故使之必窮于是乎言之者咋
舌死而聞之者終身杜其口矣在奸人以此愚人
主所以彌縫己之過惡而梁武乃以自愚惑之甚
也

唐高祖時萬年縣法曹孫伏伽上表以為隋以惡聞其

過亡天下陛下龍飛晉陽遠近響應不期年而登帝位
徒知得之之易不知隋失之之不難也臣謂宜易其覆
轍務盡下情凡人君言動不可不慎竊見陛下今日即
位而明日有獻鷄雛者此乃少年之事豈聖主所須哉
又百戲散樂亡國淫聲近太常于民間借婦女裙襦五
百餘襲以充妓衣擬五月五日元武門遊戲此亦非所
以為子孫法也凡如此類悉宜廢罷善惡之習朝夕漸
染易以移人皇太子諸王參僚左右宜謹擇其人其有

門風不能雍睦為人素無行義專好奢靡以聲色遊獵為事者不可使之親近也自古及今骨肉乖離以至敗國亡家未有不因左右離間而然也願陛下慎之上省表大悅下詔褒稱擢為治書侍御史賜帛三百匹仍頒示遠近

有犯法不至死者上特命殺之監察御史李素立諫曰三尺之法王者所與天下共也法一動搖人無所措手足陛下甫創鴻業奈何棄法臣忝法司不敢奉詔上從

之自是特承恩遇命所司授以七品清要官所司擬雍州司戶上曰此官要而不清又擬祕書郎上曰此官清而不要遂擢授侍御史

上以蘇世長為諫議大夫嘗從校獵高陵大獲禽獸上飲羣臣曰今日畋樂乎世長對曰陛下遊獵薄廢萬幾不滿十旬未足為樂上變色既而笑曰狂態復發耶對曰於臣則狂于陛下甚忠嘗侍宴披香殿酒酣謂上曰此殿煬帝之所為耶上曰卿諫似直而實多詐豈不知

此殿朕所為而謂之煬帝乎對曰臣實不知但見其華

侈如傾宮鹿臺

夏桀作傾宮殢百姓之財商紂作鹿臺其大三里高千尺七年乃成非興

王之所為故也若陛下為之誠非所宜昔臣侍陛下于武功見所居宅僅庇風雨當時亦以為足今因隋之宮室已極侈矣而又增之將何以矯其失乎上深然之


臣按唐高祖即位之初孫伏伽即上表以為宜鑒

亡隋惡聞其過之覆轍務盡下情高祖亦嘗考第

羣臣以李綱孫伏伽為第一顧謂裴寂等曰隋氏

以主驕臣諂亡天下朕即位以來每虛心求諫然
惟李綱差盡忠疑孫伏伽可謂誠直餘人猶踵敝
風俛眉而已豈朕所望哉朕視卿如愛子卿當視
朕如慈父有懷必盡勿自隱也他如李素立之守
法居之清要蘇世長之狂直屢見優容此則親見
隋之所以失而以為明鑒屈已從人獎勵諫諍庶
幾哉可謂能自克矣昔者子思子有言人主自臧
則衆謀不進事是而臧之猶却衆謀況和非以長

惡乎夫不察事之是非而悅人讚己闇莫甚焉不
度理之所在而阿諛求容諂莫甚焉君闇臣諂以
居百姓之上民不與也若此不已國無類矣觀隋
唐之所以興亡者其言豈不信哉



御定孝經衍義卷六十七

欽定四庫全書

子部

御定孝經衍義卷六十八

詳校官中書_臣羅錦森

編修_臣倉聖脈覆勘

總校官檢討_臣何思鈞

校對官修撰_臣陳初哲

謄錄監生_臣劉復善

欽定四庫全書

御定孝經衍義卷六十八

天子之孝

設諫官

太宗貞觀元年制諫官隨宰相入閣議事

尹起莘曰此貞觀致治之本也夫官以諫為名所言必本于公而宰相制天下事豈必盡能無失誠使諫官得隨事言之則不待命令既行而後救之于末流

矣

命京官五品以上更宿中書內省上謂太子少師蕭瑀
曰朕少好弓矢得良弓十數自謂無以加近以示弓工
乃曰皆非良材朕問其故工曰木心不直則脉理皆邪
弓雖勁而發矢不直朕始悟彘者辯之未精也朕以弓
矢定四方識之猶未能盡况天下之務其能徧知乎乃
令京官五品以上更宿中書內省數延見問民間疾苦
政事得失

上神采英毅羣臣進見者皆失舉措上知之每見人奏事必假以辭色冀聞規諫嘗謂公卿曰人欲自見其形必資明鏡君欲自知其過必待忠臣苟其君懷諫自賢其臣阿諛順旨君既失國臣豈能獨全如虞世基等諂事煬帝以保富貴煬帝既弑世基等亦誅公輩宜以此為戒事有得失無惜盡言

上謂侍臣曰中書門下機要之司詔敕有不便者皆應論執比來惟覩順從不聞違異若但行文書則誰不可

為何必擇才也房元齡等皆頓首謝

上問魏徵曰人主何為而明何為而暗對曰兼聽則明
偏信則暗昔堯清問小民故有苗之惡得以上聞舜明
四目達四聰故共鯀驩兜不能蔽也秦二世偏信趙高
以成望夷之禍梁武帝偏信朱异以取臺城之辱煬帝
偏信虞世基以致鼓城閣之變是故人君兼聽廣納則
貴臣不得壅蔽而下情得以上通也上曰善

四年敕百司詔敕未便者皆執奏

尹起莘曰後世人君有吝于改過者則曰業已授之
不可改也後世人臣有喜于為佞者則曰此詔旨也
不可違也夫人君吝于改過人臣喜于為佞則天下
之事明知其非而冒理行之必至于蠹政害民而後
已善哉太宗能有見于此是以惟理之從不拘己見
凡未便之事雖詔敕已行皆許執奏是豈不足以彰
無我之德哉

上問給事中孔穎達曰論語云以能問于不能以多問

于寡有若無實若虛何謂也穎達具釋其義以對且曰
非獨匹夫如是帝王亦然帝王內蘊神明外當淵默故
易稱以蒙養正以明夷泣衆若位居尊極炫耀聰明以
才陵人飾非拒諫則下情不通取亡之道也上深善其
言

上謂執政曰朕嘗恐因喜怒妄行賞罰故欲公等極諫
公等亦宜受人諫不可以己之所欲惡人違之苟自不
能受諫安能諫人又謂侍臣曰治國如治病病雖愈猶

宜將護倘遽自放縱病復作則不可救矣今國中幸安
四裔俱服誠自古所希然朕日甚一日唯懼不終故欲
數聞卿輩諫諍也魏徵曰內外治安臣不以為喜唯喜
陛下居安思危耳

帝與侍臣論安危之本中書溫彥博曰伏願陛下常如
貞觀初則善矣帝曰朕比來怠于為政乎魏徵曰貞觀
之初陛下志在節儉求諫不倦比來營繕微多諫者頗
有忤旨此其所以異耳帝拊掌大笑曰誠有是事

上問魏徵曰羣臣上書可采及召對多失次何也對曰
臣觀百司奏事常數日思之及至上前三分不能道一
況諫者拂意觸忌非陛下借之辭色豈敢盡其情哉上
由是接羣臣辭色愈溫嘗曰煬帝多猜忌臨朝對羣臣
多不語朕則不然與羣臣相親如一體耳

八年中年丞皇甫德參上言脩洛陽宮勞人收地租厚
斂俗好高髻蓋宮中所化上怒謂房元齡等曰德參欲
國家不役一人不收斗租官人皆無髮乃可其意耶欲

治其訕謗之罪魏徵諫曰賈誼當漢文帝時上書可為痛哭者一可為流涕者二自古上書不激切不能動人主之心所謂狂夫之言聖人擇焉唯陛下裁察上曰朕罪斯人則誰敢復言乃賜絹二十匹他日徵奏言陛下近日不好直言雖勉強含容非曩時之豁如上乃更加優賜拜監察御史

十一年魏徵上疏以為陛下欲善之志不及于昔時聞過必改少虧于曩日譴罰積多威怒微厲乃知貴不期

驕富不期侈非虛言也且以隋之府庫倉廩戶口甲兵之盛考之今日安得擬倫然隋以富強動之而危我以寡弱靜之而安安危之理皎然在目昔隋之未亂也自謂必無亂其未亡也自謂必無亡故賦役無窮征伐不息以至禍將及身而尚未之悟也夫覽形莫如止水鑒敗莫如亡國伏願取鑒于隋去奢從約親忠遠佞以當今之無事行疇昔之恭儉則盡善盡美固無得而稱焉夫取之實難守之甚易陛下能得其所難豈不能保其

所易乎

十二年上問魏徵曰朕政事何如往年對曰威德所加
比往年則遠矣人心悅服則不逮也上曰何也對曰陛
下往以未治為憂故日新今以既治為安故不逮上曰
今日所為亦何以異于往年耶對曰陛下初年恐人不
諫常導之使言中間悅而從之今則勉彊從之而猶有
難色也

十三年夏旱詔五品以上言事魏徵上疏以為陛下志

業比貞觀之初漸不克終者凡十條上深加獎歎云已列諸屏障朝夕瞻仰

十六年上問魏徵比來朝臣殊不論事何也對曰陛下虛心采納必有言者凡臣徇國者寡愛身者多彼畏罪故不言耳

十八年上問諫議大夫褚遂良曰舜造漆器諫者十餘人此何足諫對曰奢侈者危亡之本漆器不已將以金玉為之忠臣愛君必防其漸若禍亂已成無所復諫矣

上曰然朕有過卿亦當諫其漸朕見前世帝王拒諫者
多云業已為之或云業已許之終不為改如此欲無危
亡得乎

臣按唐太宗之納諫也制諫官隨宰相入閣議事
此真初政之首事而千古之良法也雖懸旂施板
以求善言聞過失不是過矣宋臣曾鞏有言古之
制善矣天子之所尊而聽者宰相也然接之有時
不得數且久矣至于諫官出入言動相綴接早暮

相親未聞其當退也如此則事之得失早思之不待暮而以言可也暮思之不待越宿而以言可也不諭則極辯之可也屢進而陳之宜莫若此之詳且實也雖有庸人邪人不得間焉太宗之下此制在改元旬有五日之前也豈非知當務之為急哉其時中外之臣望其丰采聞其風聲皆當踴躍奮迅冀得一言之當以裨益于王躬之萬一仰贊于治忽之幾微雖芻蕘之賤亦將咏歌舞蹈于聖朝

之不諱欲獻其狂愚之誠而況侍從之臣相與朝夕上下其議論者乎抑臣于太宗納諫之事錄之不厭其詳者誠以諸臣之因事進規其言具在考古可以驗今以備觀覽如置諸臣于側也

明皇開元五年令史官隨宰相入侍羣臣對仗奏事初貞觀之制中書門下及三品官入奏事必使諫官史官隨之有失則匡正美惡必記之諸司皆正衙奏事御史彈百官服笏冠對仗讀彈文及許敬宗李義甫用事政

多私僻奏事官多俟仗下于御座前屏人密奏監察御史及待制官遠立以俟其退諫官史官皆隨仗出仗下後事不復預聞宋璟欲復貞觀之政制自今事非的須祕密者皆令對仗奏聞史官自依故事

臣按貞觀之制善矣諫官史官隨大臣入侍此當為萬世不易之良法開元初政能紹復舊事斯為至孝矣

明皇千秋節羣臣皆獻鏡張九齡以為以鏡自照見形

容以人自照見吉凶乃述前世興亡之源為書五卷謂之千秋金鑑錄上之上賜書褒美

李林甫欲蔽人主視聽自專大權明召諸諫官謂曰今明主在上羣臣將順之不暇焉用多言諸君不見立仗馬乎食三品料一鳴輒斥去悔之何及補闕杜璡嘗上書言事明日斥為下邳令自是諫爭路絕矣

上欲廣求天下之士命通一藝以上皆詣京師李林甫恐草野之士對策斥言其姦惡建言舉人多卑賤愚

曠恐有俚言污濁聖聽乃令郡縣長官精加試練灼然超絕者具名送省委尚書覆試御史中丞監之取名實相副者聞奏既而至者皆試以詩賦論遂無一人及第者林甫乃上表賀野無遺賢

臣按開元之盛與貞觀竝稱用一林甫遂成天寶之亂而數世不息無他壅蔽之奸甚而諫諍之路絕也及當播越之餘悔不用張九齡與太宗當挫敗之際惜魏徵之已死同轍也然而九齡之在開元其

諫行言聽則不如徵之在貞觀而貞觀之時其或
奸邪有類于林甫者則能斥而去之此其始終理
亂之所以異也善乎蘇軾有言士大夫砥礪名節
正色立朝不務雷同以固祿位非獨人臣之私義
乃天下國家所恃以安者也若名節一衰忠信不
聞亂亡隨之捷如影響西漢之末敢言者惟王章
朱雲二人章死章上封事忤王鳳死而雲廢雲上書斥張禹為佞臣成帝以
雲廷辱師傅死罪不赦後意解得已然卒擯斥則公卿持祿保妻子皆張

禹孔光

二人皆亂經義獻說以固祿位者事詳本傳

之流耳故王莽以

斗筭穿窬之才盜取神器如反掌唐開元之末大

臣守正不回惟張九齡一人已忤旨罷相明皇不復聞其過以致祿山之亂治亂之機可不慎哉

代宗時元載專權恐奏事者攻訐其私乃請百官凡奏事皆先白長官長官白宰相然後奏聞仍以上旨諭百官曰比日諸司奏事煩多所言多讒毀故委長官宰相先定其可否刑部尚書顏真卿上疏以為郎官御史陞

下之耳目今使論事者先白宰相是自掩其耳目也陛下患羣臣之為讒何不察其言之虛實若所言果虛宜誅之果實宜賞之不務為此而使天下謂陛下厭聽覽之煩托此為辭以塞諫諍之路臣竊為陛下惜之太宗著門司式云其無門籍人有急奏者皆令門司與仗家唐制侍御親兵及殿前兩司號曰三衛番上分為五仗帶刀捉仗立東西廊下所以防壅蔽也天寶以後李林甫為相深疾言者道路以目上意不下逮下情不上聞蒙蔽暗鳴卒成幸蜀之

禍陵夷至于今日其所從來者漸矣夫人主大開不諱之路羣臣猶莫敢盡言況今宰相大臣裁而抑之則陛下所聞見者不過數人耳天下之士從此鉗口結舌陛下見無復言者以為天下無事可論是林甫復起于今日也陛下倘不早悟漸成孤立後雖悔之亦無及矣載聞而恨之奏真卿誹謗乙未貶峽州別駕

臣按漢宣帝時魏相白去副封以奪霍氏之權今使論事者先白宰相是甚于副封也夫使宰相有

過將孰得而論之耶肅宗即位之初已詔禁之矣
何代宗之不能紹承先志而復踵斯弊哉真卿抗
疏爭之是也

德宗問陸贄以當今切務贄以嚮日致亂由上下之情
不通勸上接下從諫乃上疏其略曰臣謂當今急務在
于審察羣情若羣情之所甚欲者陛下先行之所甚惡
者陛下先去之欲惡與天下同而天下不歸者自古及
今未之有也夫理亂之本繫于人心況于當變故動搖

之時在危疑向背之際人之所歸則植人之所去則傾陛下安可不審察羣情同其欲惡使億兆歸趣以靖邦家乎此誠當今之所急也又曰頃者竊聞輿論頗究羣情四方則患于中外意乖百辟又患于君臣道隔郡國之志不達于朝廷朝廷之誠不升于軒陛上澤闕于下布下情壅于上聞實事不必知知事不必實上下否隔于其際真偽雜糅于其間聚怨罵騰謗籍籍欲無疑阻可得乎哉疏奏旬日上無所施行亦不詰問贊又上疏其

畧曰臣聞立國之本在乎得衆得衆之要在乎見情故
仲尼以為人情者聖王之田言理道所生也又曰易乾
下坤上曰泰坤下乾上曰否損上益下曰益損下益上
曰損夫天在下而地處上于位乖矣而反謂之泰者上
下交故也君在上而臣處下于義順矣而反謂之否者
上下不交故也上約己而裕于人人必說而奉上矣豈
不謂之益乎上蔑人而肆諸己人必怨而叛上矣豈不
謂之損乎又曰舟即君道水即人情舟順水之道乃浮

違則沒君得人之情乃固失則危是以古先聖王之居人上也必以其欲從天下之心而不敢以天下之人從其欲又曰君臣意乖上下情隔故睿誠不布于羣物物情不達于睿聰軒陛之間且未相諭宇宙之廣何由自通雖復例對使臣別延宰輔既殊師錫且異公言由是人各隱情以言為諱至于變亂將起億兆同憂陛下恬然不知方謂太平可致陛下以今日之所觀驗往時之所聞孰真孰虛何得何失則事之通塞備詳之矣人之

情偽盡知之矣上乃遣中使諭之曰朕本性甚好推誠亦能納諫將謂君臣一體全不隄防緣推誠不疑多被姦人賣弄今所致患害朕思亦無它其失反在推誠又諫官論事少能慎密例自矜銜歸過于朕以自取名朕從即位以來見奏對論事者甚多大抵皆是雷同道聽塗說試加質問遽即辭窮若有奇才異能在朕豈惜拔擢朕見從前以來事祇如此所以近來不多取次對人亦非倦于接納卿宜深悉此意暫以為人君臨下

當以誠信為本諫者雖辭情鄙拙亦當優容以開言路
若震之以威折之以辯則臣下何敢盡言乃復上疏其略
曰天子之道與天同方天不以地有惡木而廢發生天
子不以時有小人而廢聽納又曰不誠則心莫之保不
信則言莫之行陛下所謂失于誠信以致患者臣竊
以斯言為過矣又曰臣聞仲虺贊揚成湯不稱其無過而
稱其改過吉甫歌誦周宣不美其無闕而美其補闕是則
聖賢之意較然著明惟以改過為能不以無過為美蓋

為人之行己必有過差上智下愚俱所不免智者改過而遷善愚者恥過而遂非遷善則其德日新遂非則其惡彌積又曰諫官不密自矜信非忠厚其于聖德固亦無虧陛下若納諫不違則傳之適足增美陛下若違諫不納又安能禁之勿傳又曰侈言無驗不必用質言當理不必違辭拙而效速者不必愚言甘而利重者不必智是皆考之以實慮之以終其用無它唯善所在又曰陛下所謂比見奏對論事皆是雷同道聽途說者臣

竊以衆多之議足見人情必有可行亦有可畏恐不宜一概輕侮而莫之省納也陛下又謂試加質問即便辭窮臣但以陛下雖窮其辭而未窮其理能服其口而未服其心又曰為下者莫不願忠為上者莫不求理然而下每苦上之不理上每苦下之不忠若是者何兩情不通故也下之情莫不願達于上上之情莫不求知于下然而下恒苦上之難達上恒苦下之難知若是者何九弊不去故也所謂九弊者上有其六而下有其三好勝

人恥聞過騁辯給眩聰明厲威嚴恣彊愎此六者君上之弊也諂諛顧望畏愼此三者臣下之弊也上好勝必甘于佞亂上恥過必忌于直諫如是則下之諂諛者順旨而忠實之語不聞矣上騁辯必勦說而折人以言上眩明必臆度而虞人以詐如是則下之顧望者自便而切磨之辭不盡矣上厲威必不能降情以接物上恣愎必不能引咎以受規如是則下之畏愼者避辜而情理之說不申矣夫以區域之廣大生靈之衆多官闕之重

深高卑之限隔自黎獻而上獲覲至尊之光景者踰億兆而無一焉就獲覲之中得接言議者又千萬不一幸而得接者猶有九弊居其間則上下之情所通鮮矣上情不通于下則人惑下情不通于上則君疑疑則不納其誠惑則不從其令誠而不見納則應之以悖令而不見從則加之以刑下悖上刑不敗何待是使亂多理少從古已然又曰昔趙武啁啁若不能出口也而為晉賢臣絳侯木訥而為漢元輔然則口給者事或非信辭屈者理

或未窮人之難知堯舜所病胡可一酬一詰而謂盡其能哉以此察天下之情固多失實以此輕天下之士必有遺才又曰諫者多表我之能好諫者直示我之能容諫者狂誣明我之能恕諫者漏泄彰我之能從是則人君與諫者交相益之道也諫者有爵賞之利君亦有理安之利諫者得獻替之名君亦得采納之名然猶諫者有失中而君無不美惟恐讜言之有不切天下之有不聞如此則納諫之德光矣上頗採用其言

臣按人主當定亂之後而審致亂之自猶治病之後而思致病之由也德宗奉天之厄其為致亂者非一然以病喻之則凡百皆客症也兼症也上下之情不通斯其本症而已矣陸贄之言接下從諫必驗之方也九弊原病之案也取過遂非而惡諫官之不能慎密德宗諱疾忌醫也若夫楊炎盧杞之流執烏喙鵠毒下咽立斃之藥以勸人飲此者也他日怒姜公輔之諫唐安公主造塔而謂之指

過求名雖以贄為之救解而怒猶未怠而罷公輔
為左庶子是則致病之由良醫禁忌之而不從也
昔蘇軾在元祐中嘗乞校正陸贄奏議上進其劄
子云人臣之納忠譬如醫者之用藥藥雖試於醫
手方多傳于古人若已經效于世間不必皆從于
己出又曰德宗以苛刻為能而贄諫之以忠厚德
宗以猜疑為術而贄勸之以推誠德宗好用兵而
贄以消兵為先德宗好聚財而贄以散財為急至

于用人聽言之法治邊馭將之方罪己以收人心
改過以應天道去小人以除民患重名器以待有
功如此之流未能悉數可謂進苦口之藥石針害
身之膏肓使德宗盡用其言則貞觀之治可復臣
既錄贊之言而并及蘇軾之說焉

憲宗嘗從容問李絳曰諫官多謗訕朝政皆無事實朕
欲摘其尤者一二人以警其餘何如對曰此殆非陛下之
意必有邪臣欲壅蔽陛下之聰明者人臣死生係人主

喜怒敢發口諫者有幾就有諫者皆晝讀夜思朝刪暮
減比得上達什無一二故人主孜孜求諫猶懼不至況罪
之乎如此杜天下之口非社稷之福也上善其言而止
蓋屋尉集賢校理白居易作樂府及詩百餘篇規諷
時事流聞禁中上見而悅之召入翰林為學士上謂宰
相曰太宗以神聖之資羣臣進諫者猶往復數四況
朕寡昧自今事有違卿當十論無但一二而已

臣按古者諫無專官而後世有專官官以諫為名

而不諫則可乎諫而不能切中時弊則遂無曠厥
官乎然而發口諫者無幾也諫而畢伸其說懷章
欲上不為刪減其十之六七者無幾也故曰孜孜
求諫猶懼其不至也况罪之乎古之采風詩聽謠
祥凡以時事之得失係焉居易之樂府多所規
諷流傳禁中憲宗見而悅之亦足令天下知朝廷
不以語言文字為諱也

穆宗見夏州觀察判官柳公權書跡愛之以公權為右

拾遺翰林侍書學士上問公權卿書何能如是之善對
曰用筆在心心正則筆正上默然改容知其以筆諫也
臣按古者工執藝事以諫書亦藝也公權筆諫不
愧于侍書矣

宣宗欲幸華清宮諫官論之甚切上為之止上樂聞規
諫凡諫官論事門下封駁苟合于理多屈意從之得大
臣章奏必焚香盥手而讀之

臣按唐宣宗之焚香盥手讀大臣章疏得古天子

齋戒受諫之遺意

宋太祖詔百官每五日內殿起居以次轉對指陳時政得失事關急切者許不時上章無以觸諱為懼

臣按此宋太祖之所以求言者也至于太宗亦嘗詔羣臣欲面奏事者即時引對此宋初言路所以無壅更參之唐貞觀中以諫官隨三品以上入閣議事之制庶幾忠言讜論日有所聞矣其後宋之子孫蓋不能遵祖宗舊章臣僚非差遣合上殿者

皆不得對亦有朝臣乞上殿敷奏邊事踰月不得
報者何其慢也夫差遣上殿轉對之例洵有合于
古之諸侯見天子敷奏以言明試以功之意也以
方面之臣天子數十百城之寄而臨行不得密邇
天顏陳其所以治狀得請便宜及他有所建白不
疑于輕視人民社稷也耶然則自府道以上受任
合當令其上殿轉對也

太宗詔求直言知睦州田錫上疏略曰給事中不得其

人左右補遺不得其職以致陛下有朝令夕改捨近謀遠之事又言時久升平天下混一故左取右奉致陛下以功業自多然臨御九年四方雖寧而刑罰未甚措水旱未甚調陛下謂之太平誰敢不謂之太平陛下謂之至理誰敢不謂之至理又言聽用太廣則條制必繁條制既繁則依從者少自今凡有奏陳幸令大臣議而行之毋使垂之空言示之寡信

臣按田錫之言陛下謂之太平誰敢不謂之太平

陛下謂之至理誰敢不謂之至理所謂進言者皆曰已治已安也言之于太宗之時亦猶賈生之于漢文矣

仁宗景祐三年詔戒羣臣越職言事

康定元年除越職言事之禁

臣按仁宗為宋一代令主屬呂夷簡執政頗專權用事如開封府范仲淹上百官圖指其次第曰如此為序遷如此為不次如此則私又為四論以獻

譏切時弊夷簡因訴其越職言事離間君臣遂落
職知饒州集賢校理余靖館閣校勘尹洙歐陽修
皆以直仲淹坐貶然則越職言事之禁出于公乎
出于私乎抑禁之便于公乎便于私乎夫諫豈有
常職必職言而後言則言之路隘矣必職言而後
言必至于職言而亦不得言則言之路絕矣仁宗
尋以富弼言除其禁不遠之復也其斯以為仁宗
也乎

臣又按仁宗自慶厯以後求直言增諫官大書屢書爛然史冊故其時衆正盈朝一二小人雖偶進而旋斥致治之盛近世亦罕焉故常謂唐太宗之納諫也勤于始而怠于終仁宗之納諫也厚于終以救其始必能終之為難則仁宗其優矣

慶厯三年增置諫官以歐陽脩王素蔡襄知諫院余靖為右正言襄喜言路開而慮正人難久立乃上疏曰任諫非難聽諫為難聽諫非難用諫為難脩等三人忠誠

剛正必能盡言臣恐邪人不利必造為禦之之說其禦之不過有三曰好名好進彰君過爾願陛下察之毋使有好諫之名而無其實脩每入對帝必延問執政咨所宜行既多所張弛小人翕翕不便脩慮善人必不勝數為帝分別言之初范仲淹之貶饒州脩及尹洙余靖皆以直仲淹見逐羣邪目之曰黨人于是朋黨之論起脩乃進朋黨論脩論事切直人視之如讐帝獨獎其敢言顧侍臣曰如歐陽脩者何處得來

孝宗隆興二年詔輔臣晚對便殿詔曰朕每聽朝議政頃刻之際意有未盡自今執政大臣或有奏請宜于申未間入對便殿庶可坐論得盡所聞期躋于治

臣按輔臣經邦論道乃踞踏于階前尺寸之地謀議于頃刻之間固無由盡所懷而舉其職也夫以輔臣之尊尚不得從容展對而況庶官乎孝宗之詔可謂知要矣明孝宗嘗御午門或御平臺或煖閣屢召大臣詳議政事商度可否藹然如家人父

子故弘治之盛有上下交泰之意若兩孝宗者皆有足法者也

以上設諫官

御定孝經衍義卷六十八